



Uffants da Turitg e Basilea emprendan rumantsch. MAD

# Las lecziuns cumenzan puspè

## Curs da rumantsch per uffants a Turitg e Basilea:

■ (cp) Sin iniziativa da la Quarta Lingua (QL) e da la Lia Rumantscha (LR) pon uffants rumantschs dal chantun da Turitg e conturn puspè frequentar lecziuns da rumantsch l'onn da scola 2016/17. Er a Basilea cuntinuesch'ins cun il curs facultativ che vegn organisà da l'uniun «Scola rumantscha Basilea».

Gia il terz onn han uffants turitgais da geniturs rumantschs la pussaivladad da s'aprofundar en la lingua da lur mamma u da lur bab. Il curs vegn pussibilità da la QL, da la LR e dal fond da lottaria dal chantun da Turitg. Durant duas lecziuns per emna pon uffants emprender rumantsch e meglierar lur enconuschientschas e quai a moda ludica e confurma al

stgalim. Las personas d'instrucziun instrueschan en lur idiom. L'instrucziun cumenza e finescha adina en la gruppa gronda. Tranteren lavuran ils uffants tenor diferents temas en gruppas pli pitschnas.

### Lecziuns da rumantsch era puspè a Basilea

Il curs da lingua e cultura ha lieu cumplementarmain a l'instrucziun da scola mintgamai la mesemna da las 14.30 fin las 16.15 en la chasa da scola Hirschengraben amez la citad da Turitg. L'onn da curs 2016/17 cumenza ils 31 d'avust 2016, il curs custa 100 francs per uffant.

Grazia al success dals ultims onns pon er ils uffants da Basilea-Citad cu-

menzar cun il terz onn da scola. Il curs cumenza ils 27 d'avust 2016 ed ha lieu la sonda damaun tranter las 10.00 e las 12.00 en la chasa da scola Sandgruben. Il curs vegn purtà da l'uniun «Scola rumantscha Basilea» cun sustegn dal Departament d'educaziun dal chantun da Basilea-Citad, da la LR, da l'Uffizi federal da cultura e da la Promoziun da linguas dal chantun Grischun. Il curs è gratuit. Uffants da geniturs interessads dastgan frequentar ina lecziun d'emprova.

Turitg: [uffants@rumantsch.ch](mailto:uffants@rumantsch.ch)  
 Basilea: [barbaraalder@bluewin.ch](mailto:barbaraalder@bluewin.ch)  
 Ulteriuras infurmaziuns:  
[www.liarumantscha.ch](http://www.liarumantscha.ch)